



KEMENTERIAN PERPADUAN NEGARA

**KENYATAAN MEDIA
MENTERI PERPADUAN NEGARA**

**ULANG TAHUN TARIKH PENGISYTIHARAN KEMERDEKAAN
PERSEKUTUAN TANAH MELAYU**

Tanggal 20 Februari 1956 bukan sekadar satu catatan dalam sejarah negara. Ia merupakan detik kebangkitan sebuah negara bangsa, saat harapan seluruh rakyat disatukan dan titik mula perjalanan menuju kemerdekaan yang sebenar. Pada tarikh inilah, sekembalinya Rombongan Merdeka dari London, Almarhum Tunku Abdul Rahman Putra Al-Haj telah mengumumkan kepada rakyat tarikh kemerdekaan Persekutuan Tanah Melayu.

Peristiwa bersejarah ini membuktikan bahawa kemerdekaan tidak lahir dengan mudah. Ia dibina melalui rundingan yang penuh kebijaksanaan, semangat toleransi, pengorbanan yang besar serta perpaduan rakyat berbilang kaum. Kesepakatan yang dicapai ketika itu menjadi asas kukuh kepada pembentukan negara bangsa yang merdeka, berdaulat dan dihormati.

Sejarah ialah kompas masa depan dan rujukan penting dalam pembinaan negara. Melalui sejarah, kita memahami akar perjuangan, mengenali nilai yang membentuk identiti nasional dan menyedari harga sebenar sebuah kemerdekaan. Dengan kefahaman sejarah yang mendalam, generasi hari ini akan lebih berarah, berprinsip dan sentiasa berpaksikan jati diri kebangsaan dalam mendepani cabaran semasa serta membina masa depan negara.

Kerajaan MADANI tepat pada masanya mengangkat semula martabat sejarah negara dengan memperkukuh pendidikan sejarah melalui Rancangan Pendidikan Negara serta memastikan generasi muda memahami erti sebenar kemerdekaan dan tanggungjawab sebagai warganegara. Usaha ini bukan sekadar memperkaya pengetahuan, tetapi membina kesedaran sivik dan semangat patriotisme.

Tahun lalu, Kementerian Perpaduan Negara telah menubuhkan Majlis Sejarawan Negara buat julung kalinya sebagai wadah menghimpunkan kepakaran, memelihara naratif sejarah yang sahih serta memastikan sejarah negara terus hidup dalam jiwa rakyat. Kementerian melalui Arkib Negara Malaysia dan Jabatan Muzium Malaysia akan terus memperkukuh usaha pemeliharaan, pendokumentasian dan penghayatan sejarah agar khazanah negara terus terpelihara dan dapat diwariskan kepada generasi akan datang.

Segala usaha ini merupakan sebahagian daripada ikhtiar berterusan untuk membina perpaduan berteraskan kesedaran sejarah dan penghayatan nilai kenegaraan. Sesungguhnya, sejarah adalah akar kepada perpaduan, dan perpaduan adalah benteng kepada kelangsungan negara.

Marilah kita bersama-sama mengenang sejarah, menghargai perjuangan para negarawan dan memperkukuh tekad untuk membina Malaysia yang bersatu, harmoni dan berdaya tahan demi generasi hari ini serta masa hadapan.

YB DATUK AARON AGO DAGANG
MENTERI PERPADUAN NEGARA

20 Februari 2026

KPN.100-9/1/16 (10)

